

## **Maniitsup kommuneani aalisarneq pillugu isumasioqatigiinneq**

Maniitsup kommuneani aalisarneq pillugu isumasioqatigiinneq ulluni 5. aamma 6. februar 2008 Maniitsumi ingerlanneqarpoq.

Isumasioqatigiinneq Aalisarnermut naalakkersumit Finn Karlsen-imit, Maniitsup kommuneani kommunalbestyrelsemit, aalisarnermut pisortaqaarfimmiit, Maniitsup kommuneani aalisartut peqatigiiffiinit, KNAPK-mit aamma Maniitsup kommuneani tunitsivinnit peqataaffigineqarpoq.

Isumasioqatigiinnermi pingaarnertut qulequttat ukua sammineqarput:

1. Maniitsup kommuneani aalisarneq maannakkut siunissamilu
2. Aalisariutit inuttassaaleqisarnerat
3. Aalisariutinik alisarnermilu atortunik nutarsaaneq /ESU aningaasaliisartullu allat
4. Aalisariutaatillit atugarisat aningaasaqarnerallu misissuiffigineqarnissaanik kissaateqarneq
5. Maniitsup kommuneani tunitsiviit aamma tunisinermi akít.

### **Pill.: imm. 1. Maniitsup kommuneani aalisarneq maannakkut siunissamilu aamma imm. 2: Aalisariutit inuttassaaleqisarnerat**

Maluginiarneqarpoq eqqarsarnartoqartinneqarlunilu Maniitsup kommuneani aalisariutit agguaqatigiissillugu ukiut 25-nik pisoqaatigimmata aamma 2007-imi kommunemi aalisartut piniartullu agguaqatigiissillugu 45/46-nik ukioqarmata. Aalisariutini inuttassaaleqisarneq ajornartorsiutaavoq tamatumalu eqqartorneqarnerani isumasioqatigiinnit oqariartuutigineqarpoq aalisariutit amerlasuut taakkunanilu atortut nutaanngilivallaarsimasut ullutsinnullu naleqqukkunnaarsimasut pigineqarmata. Isumasioqatigiittut isumaqarput nutarterineq pisariaqartoq aalisariutit qisuusut allallu aalisariutit nutaanngilisimasut qimakkiartorneqartariaqarmata, aalisariutit ullutsinnut tulluuttunik taarseriartuaartariaqarmata. Aalisariutit nutaanngitsut atortorissaartuunngitsullu suliffigissallugit inuusuttunit kajumerineqanngillat aamma timimut assoruunnartumik suliffiupput aalisartunut timikkut nungullarsaataasumik. Aalisariutit nutaanngitsut eqqiluisaarnissaq eqqarsaatigalugu pisariaqartunik amigaateqarput. Qisunnik aalisariutaatillit aalisarnerminnik aninerminni taarsiiffigineqarlutik tapiiffigineqarsinnaasariaqarput. Aalisariutit nutaat ima atortulersorneqartuusariaqarput, inuttanik ikinnerpaamik pisariaqartitsisuussallutik, soorlu assersuutitut taaneqarsinnaapput erlaviaatit, neqitsersuutit il.il.

Tamakkua piaanerpaamik politikikkut isummerfigineqarnissaat pisariaqarluinalerpoq. Taamaattoqareerpat aalisariutaatillit aatsaat ingerlariaqqissinnaassagaluarput, taamaattoqassappallu aningaasalersuisinnaaneq aamma politikikkut qulakkeerneqartariaqarpoq.

Aatsitassanik piaanerit nutaat aamma aluminiumimik aatsitsivissaq pilersinneqarpata suliffippassuarnik pilersitsisussaaput. Aalisarneq aalisariutillu sulisoqarnik-

kut inuutissarsiutitut nutaanut taakkununga unammillersinnaassappata isumasioqatigiittut nalilerpaat aalisariutitigut atortutigullu nutarsaanissaq pisariaqarluinnartoq aningaasalersuinissarlu pisariaqarluinnartoq. Isumasioqatigiittunit piumasarineqarpoq nuna tamakkerlugu aalisarneq pillugu isumasioqatigiittoqartariaqartoq ajornartorsiut nuna tamakkerlugu atuuttussaammat aalisarneq tamaat sukumiisumik eqqartorneqarnissaa pisariaqartutut isumasioqatigiittunit nalilerneqarmat.

Aalisarneq pillugu nuna tamakkerlugu isumasioqatigiinnissaq Aalisarnermut piniarnermullu naalakkersuisup neriorsuutigisinnaanngikkaluarlugu misissorniarpaasulissutiginiarlugulu 2009-imi isumasioqatigiinnerup ingerlanneqarsinnaanera.

Inuusuttut amerlanerit aalisarnermik inuussutissarsuteqarnermut isissappata suut tamatumani pisariaqartinneqarnersut eqqartorneqartariaqartoq misissorneqarluni aamma inusuttut aalisarnermut ilinniartinneqarnissaat pikkorissartinneqartuarnissaallu pisariaqartoq isumasioqatigiittunit oqariatuutigineqarpoq.

### **Pill.: imm. 3: Aalisariutinik alisarnermilu atortunik nutarsaaneg /ESU aningaasaliisartullu allat**

Isumasioqatigiittunit piumasarineqarpoq ESU nutaamik aaqqissuussiffigineqartariaqartoq inatsisartunit annertunerusumik aningaasaliiffigineqarneratigut taamaallillugu aalisariutigissaanermut aalisarnermilu atortunut aningaasaliisinaanera ullumikkuminngarnit annertunerulersillugu. Periarfissatut taaneqarpoq ESU-mut taarsigassarsisimasut akiliutaat ukiumut isertut annertoqataannik taarsigassarsiasanut puljemut ikisisoqartarnissaa. Inuusuttut aalisarnermut isertussat pitsaasumik periarfissinneqarnissaat isumasioqatigiittunit annertuumik pingaatinneqarmat.

ESU eqqartorneqarnerani Inuussutissarsiutigalugu umiatsiaaqqat aamma eqqartorneqarput peqataasunit ilaannit piumasarineqarpoq umiatsiaaqqat Poca-t peerlugit umiatsiaaqqat nunatsinni sanaat tapiiffigineqarsinnaasuni salliutinneqartariaqartut. Ataatsimeeqataasulli arlallit aamma isumaqarput umiatsiaaqqap akia pingaaruteqartoq, tassa umiatsiaaraq nunatsinni nioqqutissiaq akitigut eqqussanut qanillattortariaqartoq soqutigineqarnerulissaguni.

Tassunga atatillugu isumasioqatigiittunit aamma oqariatuutigineqarpoq tunisassiat aalisakkat neqillu nunatsinni tunisassiarineqartut illersorneqartariaqartut. Aalisartut piniartullu illersorniarutsigik nunatsinni tunisassiat illersortariaqarpavut, soorlu aalisakkat neqillu nunatsinni naammattut pigeriigaluagut avataanit tikisinneqartarput. Island assersuutigineqarpoq nammineq tunisassiaminnik illersuilluartutut.

**Pill. imm. 4: Aalisariutaatillit atugarisat aningaasaqarnerallu misissuiffigineqarnissaanik kissaateqarneq**

Aalisartunit kissaatigineqarpoq aalisariutaatillit ingerlatsinerminni atugarisaat aningaasaqarnerallu misissuiffigineqassasoq ajornartorsiutit atugaat soorlu tunitsivinnut tunisinermi killilersuinerit, angallammik ingerlatsinermi aningaasartuutit, tunisinermut akit mikivallaarnerat, inuttassaaleqineq il.il. misissuiffigineqarlutik atugarisaasa annertunerusumik qulaarneqarnissaat siunertaralugu.

Tassunga ilanngullugu kissaatigineqarpoq aalisariutit teknikkikkut atortui misissuiffigineqassasut atortutigut inissisimaneq sukumiinerusumik paasineqarnissaa siunertaralugu.

Misissuinermi paasisat tunngavigineqarsinnaapput aalisarnej pillugu nuna tamakkerlugu isumasioqatiginnissami toqqammavissatut.

Aalisarnermut naalakkersuisoqarfimmit ilisimatitsissutigineqarpoq qarasaasiami atortumik peqareersoq raajarniat atugarisaannik misissuinermi atorineqarsimasumik, taannalu uani misissuinermi atorineqarsinnaalluartoq.

Isumasioqatigiit piumasarivaat sinerissap qanituani aalisariutaatillit ingerlatsinerminni aningaasaqarnikkut atortutigullu atugarisaat misissuiffigineqartariaqartoq. Misissuinissamut aningaasaliisussat nassaarineqartariaqarput, soorlu Namminersornerullutik oqartussat aamma KNAPK periarfissaapput, soorunami komunit sulinermi peqataassapput..

Misissuineq pisariaqartutut nalilernerqarpoq tikkuussissammat qanoq iliorluni ingerlariaqqittoqarsinnaaneranik aamma aatsitassanik piiiaaffiit nutaat aluminiuumillu aatsitsivimmik pilersitsisoqarpat aalisarnermut aalisariutinullu kingunissaat eqqarsaatigalugit.

**Pill.: imm. 5: Maniitsup kommuneani tunitsiviit aamma tunisinermi akit.**

Maniitsumi aalisakkanik tunitsivik pigineqarpoq Maniitsoq Fiskeindustri A/S-imit, Kangaamiuni aamma Atammimmi tunitsiviit pigineqarput Royal Greenland A/S-imit kiisalu Napasumi tunitsivik pigineqarpoq Arctic Green Food AS-imit.

Selskabet taakku angissutsimikkut pisinnaasamikullu assigiinngitsorujussuarmik inisssisimapput. Maniitsoq Fiskeindustri A/S pisortanit pigineqanngilaq aamma pisortanit tapiissutinik pineq ajorpoq. Arctic Green Food A/S Namminersornerullutik oqartussanut isumaqatigiissut servicekontrakt atorlugu kiffartuussineq suliarisarpaat. Tunitsivinni pisinnaassutsikkut piorsaanerit ingerlanneqarput ingerlanniarnearlutillu soorunami aningaasaliissutaasinnaasut annertussusaat killiliipput taamatut piorsaanermermi.

Ukiuni amerlasuunngortuni sinerissap qanittuani aalisarnermi ajornartorsiutit pingaartumik aallaaveqarput tunisinermi akit mikivallaarnerannik.

Aalisariutit ingerlanneqarnerannut soorlu orsussamut tapiissutit imaluunniit tunisinermi akimik minnerpaaffiliinerit Namminersornerullutik oqartussaniit atorunnaarsinneqarnikuupput tamanna politikikkut aalajangigaalluni, naak aalisartunit suli kissaatigineqaraluartoq ingerlatsinerminni pisortanit oqilisaaffigineqarnissartik.

Tunitsiviit tunisinermi aki tunniuttagaat aalisartunit naammagineqanngilaq aningaasartuutit taamak qaffasitsigitillugit akilersinnaasumik aammalu ineriartortit-sisumik ingerlatsinissamut tunisinermi akit ukiuni amerlasuunngortuni atuuttut periarfissiinngimmata. Oqaatigineqarpoq akit appasinnerannut peqqutaaqataasoq qerisuinnarnik avammut tunisassionerput aalisakkammi qerisut sikulersukkanut sanilliullugit akikinnerummata. Qerisuunngitsunik timmisartut avammut assartuinermi atorpeqassappata timmisartut assartuutitut naleqquttuusariaqartut oqariartuutigineqarpoq.

Aalisarluarnerup nalaani tunitsiviit pisinnaasaat annikippallaalertarput taamaammallu aalisartut isaanniit pitsaanerutinneqartarpoq tunitsivimmik umiarsualiisarneq ulloq unnuarlu pisaminnik tunisisinnaasaramik, aningaasartuutaat annikinnerusaramik aamma illoqarfimmut tikittaqaattaratik ullut arlallit illoqarfik tikinnagu aalisarnerminni inuttatik sivisunerusumik pigiinnarsinnaasaramikkit.

Umiarsualiinerli aamma nunami tunitsivimmik eqquisarpoq nunami tunitsivimmut tunisat annikippallaalertarmata. Taamaammat aalisartut nunamilu tunitsiviit akornanni immikkut soqutigisat tassani aporaattutut inissisimasarput.

Immikkortup matuma oqallisiginerani isumasioqatigiittunit annertuumik eqqartorneqarput tunisinermi akit mikivallaarnerat. Isumasioqatigiit oqariartuutigivaat KNAPK tunitsivinnut isumaqatiginninniartarnermini tamanguaarnerusariaqartoq aamma akinik isumaqatiginninniartarnerit kattuffiup ilaasortaminik sullissinermini pingaartinnerusariaqarai. Namminersornerullutik oqartussat tapiissutinik tunniussiniangippata akinik isumaqatigiinniartarnerit aqutissaammata. Isumasioqatiinnermi amerlanerussuteqartunit isumaqarfigineqarpoq kattuffiup tunisinermi akitigut sullissinera ukiuni makkunani naammaginangitsumik ingerlasoq. Ilaatigut soorlu Maniitsoq Fiskeindustri AS-imut tunisinermi akinik isumaqatigiissuteqartoqartarsimangilaq imaluunnit kingusinaartumik isumaqatigiissutit atsiorneqartarsimapput aalisartunut isertitassaraluanik annasaqaataasumik kinguneqartartumik. Siornatigut KNAPK ornigulluni akinik isumaqatiginninniartarnerit ingerlattarpai ukiunili makkunani soorlu Maniitsoq Fiskeindustri A/S selskabetut anginngitsutut taasariaqartoq KNAPK-p aamma Maniitsoq Fiskeindustri A/S akornanni akinik isumaqatiginninniartarnerit allakkasuartaatit atorlugit ingerlanneqartarput, tamatumalu kingunerigajuppaa tunisermi akit aalisartunut naammaginangitsut anguneqartarmata.

Isumaqatigininniartariaaseq KNAPK-mit atorpeqartoq eqqarsaatigeqqinneqartariaqartutut isumasioqatiginnermi oqaatigineqarpoq.

Isumasioqatigiinneq eqeersimaartumik oqalliffiuvoq eqqartorneqartut oqariartuutigineqartullu pingaarnersiorlugit taamaalillugit allaaserineqarput.